



*Sept freres Hebrieux avec leur mere sont cruellement tourmentez, ne voulans enfreindre la Loy de Dieu, & meurent constamment.*



ES affaires des Israélites furent reduites à telle calamité, qu'il est presque incroyable ce qui en est écrit au second des Machabées : car Antiochus contraignit par diuers tourmens les Juifs de quitter leur Loy, Traditions & Ordonnances de leurs peres, les faisans meurtrir par milliers, & vendre leurs femmes & enfans comme esclaves. Outre ce, fut mis à mort le bon vieillard Eleazar, pour n'auoir voulu contre la Loy manger de la chair de porc. Et pour ce mesme fait Antiochus fit cruellement mourir sept freres avec leur mere : le premier desquels fut battu d'escourgées, & apres eut la peau de la teste enleuée, les mains & les pieds coupez en la presence de ses freres & de sa mere ; & estant en ce piteux estat, le fit rostir en vne grande poëlle ardente. Or comme on le tourmentoit par long espace de temps, ses six freres & mere s'exhortoient l'un l'autre à mourir de bon courage, en loüant le Seigneur. Ainsi furent-ils l'un apres l'autre tourmentez en presence de leur mere, tous iusqu'au plus petit, qui estant encouragé par elle, souffrit constamment cette mort cruelle & tyrannique. Dont Antiochus embrasé de courroux contre eux, fit aussi mourir leur mere.